

Urs Decurtins, hotelier, Sedrun

16.12.88
GQ



Sd. Nus savein che nies viadi terrester cuoza mo in pign temps. Tgi sto ir pli baul e tgi pli tard. Perquei lein nus sbasar nies tgau en humilitonza ed urar: Segner, Tia veglia daventi.

Sche in carstgaun miera nunspetgadamein ella flur dils onns, lu caschuna sia mort gronda dolur e tristezia a geniturs, fargliuns e buca meins ad amitgs e convischins, insumma all'entira cumionza. La dolur para savens nunsurportabla. Quei havein nus saviu constatar danovamein, cura ch'il zenn grond da s. Vigeli ha annunziau ils 13 d'october 1988 la mort da nies convischin Urs Decurtins. Nuncapeivel - e tuttina petra verdad.

Sia veta e clamada

Urs Decurtins ei naschiuss il 28 da mars 1953 sco secund fegl dals consorts Hans ed Alice Decurtins-Bühler. El ravugl da sia famiglia eis el carschius si el hotel Oberalp - ensemens cun siu frar Carli e cun la sora Marlis. Igl ambient da famiglia, mo era l'influenza dalla buna tatta Luisia e la dérivonza dils «Mugglis» han giu gronda influenza sil svilup e caratter dil car defunct. Las scolas primaras frequenta el a Sedrun. Gia cun 13 onns serenda el a Sviz el collegi Maria-Hilf, nua ch'el absolva entginas classas dalla partizion mercantila. Silsuenter seperfecziunescha el ad Estavayer-le-Lac el franzos. Igl ei evident ch'el ha en egl la clamada da hotelier. Ord quei motiv frequenta el duront plirs sem-

sters la scola professiunala per hotellaria a Lucerna, nua ch'el acquista il diplom per quella branscha. Per far practica e seperfecziunar en sia clamada s'engascha el per pli liung temps el hotel Mövenpick a Losanna e pli tard sco schef da recepziun el hotel Au Lac ad Ouchy sper Losanna.

Returnaus en sia patria tuatschina, surpren el igl onn 1978 sco gerant il menaschi dil restaurant a Milez, ch'el empeila entgins onns per cumpleina cumentientscha dalla societad dils runals. Era pli tard segida el cun quella fatschenta cun plaid e cussegli. - Malgrad ch'el s'engascha pli e pli fetg cun la direzzion digl agen hotel, sedecida el igl onn 1986 dad aunc inaga empalar il menaschi a Milez - e quei en relaziuns pauc emperneivlas duront las lavurs d'en-grondazifun dil restaurant.

Cun l'entschatta digl onn 1987 surpren el il hotel Oberalp ch'el acquista entras cumpra da ses geniturs. El demuossa tschaffen e plascher per sia fatschenta. Tscheu e leu dat ei enqual midada ed en sia fantasia sereghelian divers plans pigl avegnir. Dotaus cun bunas enconuschienschas e propri cun duns commercials ed organisatorics - ed adina en concordanza cun ses survivents - empeila el la fatschenta cun success. - Grond agid e sustegn ha el davart da ses geniturs e da sia onda Rita. Il hotel Oberalp, ina fatschenta da famiglia cun tradizion, che ha saviu festivar avon paucs onns il giubileum da 75 onns, ei en buns mauns e vul manteiner sia tradizion e siu bien num.

Tuttenina vegnan tuttas speronzas satradas. Il destin vul auter. In malruaus per nus nuncapeivel tschaffa il giuven hotelier plein speranza. Nus che stein sper sia fossa plein dolur lein se-spruar da capir la veglia dil Segner. Igl Urs cun siu bien cor e cun siu spert allert ha surventschiu il pitir. Igl ei vegniu pli vit dapi ch'el ei buca pli denter nus. Ina baselia fullanada ha assistiu al survetsch divin ed accumpaignau il car defunct alla fossa sin santeri a Sedrun. Igl ei stau ina sepultura che ha fatg impresiun. Igl edificont riug da bara da nies augsegner Sur Giusep Cathomas, las numerusas s. messas, flurs e tschupials han mitigau empau la dolur e dau consolaziun e speranza. - Alla famiglia en malencurada cordiala condolentscha ed al car defunct giavischein nus il ruauus perpeten.